


«Asaka» bank: 2016 yilning 9 oyi mobaynidagi faoliyat yakunlari

2016 yil 22 oktyabrda «Asaka» bank Boshqaruvining kengaytirilgan majlisi bo'lib o'tdi.


Majlisda «Asaka» bankning 2016 yilning 9 oyi mobaynidagi faoliyati yakunlari, O'zbekiston Respublikasining Birinchi Prezidenti I.A.Karimovning "2015 yilda mamlakatimizni ijtimoiy-iqtisodiy rivojlantirish yakunlari hamda 2016 yilga mo'ljallangan iqtisodiy dasturning eng muhim ustuvor vazifalari"ga bag'ishlab, joriy yilning 15 yanvarida Vazirlar Mahkamasida o'tkazilgan yig'ilishdagi ma'ruzasida belgilab berilgan ustuvor vazifalar ijrosi muhokama qilindi.

«Asaka» bank Boshqaruvi qayd etadiki, bankning 2016 yilning 9 oyi mobaynidagi faoliyati Vazirlar Mahkamasining 2016 yil 15 yanvardagi majlisida O'zbekiston Respublikasining Birinchi Prezidenti I.A.Karimov tomonidan belgilab berilgan 2016 yilda mamlakatni ijtimoiy-iqtisodiy rivojlantirish dasturining eng muhim ustuvor vazifalarini izchil amalga oshirish, O'zbekiston Respublikasi Markaziy banki Boshqaruvining yig'ilishlarida belgilab berilgan banklarning barqarorligini mustahkamlash, kapitallashuv darajasini oshirish, yuqori xalqaro reyting ko'rsatkichlariga erishish, aholi va xo'jalik yurituvchi subyektlarning bo'sh pul mablag'larini bank depozitlariga jalb qilishni ko'paytirish, bank aktivlari va kredit portfeli sifatini yaxshilash, bankning investisiya jarayonlaridagi ishtirokini yanada faollashtirishga qaratildi.

Bank jami aktivlari joriy yilning 9 oyi davomida 1,14 trln.so'mga o'sdi va 2016 yil 1 oktyabr holatiga 7,79 trln.so'mni tashkil etdi.




Bank jami kapitalini 105,7 mlrd.so'mga o'sishiga erishildi va 976,9 mlrd.so'mga yetkazildi.




Bank muntazam ravishda o'z tarkibiy tuzilmalari faoliyati samaradorligini oshirish va mamlakatimiz moliya bozoridagi ishtirokini kengaytirish bo'yicha faol ishlar olib bormoqda. Hozirgi kunda bankning tarmoq tizimi respublikamizning butun hududini qamrab olgan bo'lib, 26 ta filial, 85 ta mini bank, 272 ta chakana bank xizmatlari ko'rsatuvchi shahobchalar orqali aholi va xo'jalik yurituvchi subyektlarga barcha turdagi yuqori sifatli bank xizmatlarini ko'rsatib kelmoqda.

Bank tomonidan mijozlar bazasini kengaytirish borasida ham keng qamrovli ishlar olib borildi. Buning natijasida mijozlar soni 264,9 ming nafarga ko'paydi va ularning soni 1860,5 ming nafarni tashkil qildi.



2016 yil 1 oktyabr holatiga respublikamiz iqtisodiyotining turli sohalariga yo'naltirilgan bank kredit qo'yilmalari hajmi 4089,5 mlrd.so'mni tashkil qildi.




Kredit qo'yilmalarining 3 706,4 mlrd.so'm miqdoridagi qismi uzoq muddatli kreditlardan iborat, shu jumladan investitsion kreditlar – 3 148,5 mlrd.so'm.

«Asaka» bank tashkil etilganidan boshlab asosiy e'tiborni respublikamiz iqtisodiyotining muhim tarmoqlarini rivojlantirishga qaratilgan investitsion loyihalarni moliyalashtirishga qaratib kelmoqda. Jumladan, Bank tomonidan avtomobilsozlik, tog'-kon, neft-gaz, kimyo, energetika, yengil, oziq-ovqat, farmasevtika sanoati, transport, qurilish va boshqa tarmoqlarning investitsion loyihalari faol moliyalashtirib kelinmoqda.

Bank tomonidan investitsion loyihalarni moliyalashtirish uchun 1 078,5 mlrd.so'm miqdorida kreditlar ajratildi, 28,1 mlrd.som miqdorida lizing xizmatlari ko'rsatilib, lizing portfeli hajmi 113,8 mlrd.so'mni tashkil qildi.

Mamlakatimizda kichik biznes va xususiy tadbirkorlikni rivojlantirish, ishlab chiqarish va xizmat ko'rsatish sohalarini qo'llab-quvvatlash borasida ko'rilayotgan chora-tadbirlarda «Asaka» bankning hissasi oshib bormoqda.

Jumladan, Bank tomonidan kichik biznes va xususiy tadbirkorlik subyektlarini doimiy ravishda qo'llab-quvvatlash va ularga ko'rsatilayotgan bank xizmatlari turlarini kengaytirish, sifatini yanada yaxshilash va kredit mablag'lari hajmini ko'paytirish bo'yicha ishlarni faol davom ettirib, joriy yil 9 oyi davomida barcha moliyalash manbalari hisobidan kichik biznes subyektlariga 1 243,5 mlrd.so'm miqdorida kredit mablag'lari ajratildi.




Shu jumladan, ayollar tadbirkorligini tashkil etish va rivojlantirishga 106,1 mlrd.so'm, xizmat ko'rsatish va servis sohasini rivojlantirish uchun 200,1 mlrd.so'm, oilaviy tadbirkorlik va hunarmandchilikni rivojlantirish uchun 11,6 mlrd.so'm, ta'lim muassasalari bitiruvchilariga tadbirkorlik faoliyatini yo'lga qo'yishlari uchun 11,8 mlrd.so'm, oziq-ovqat va nooziq-ovqat tovarlari ishlab chiqaruvchi tadbirkorlarga 528,7 mlrd.so'm miqdorida kreditlar ajratildi.

Buning natijasida respublikamizning barcha hududlarida, ayniqsa mehnat resurslari zich joylashgan hududlarda xizmat ko'rsatish muassasalari tashkil etish, mahalliy mahsulotlar ishlab chiqarish salohiyatini oshirib, respublikamiz aholisini arzon va sifatli mahsulotlar bilan ta'minlashni yaxshilashga, ayollar tadbirkorligi, kasanachilik va hunarmandchilikni rivojlantirishga hamda yangi ish o'rinlari yaratishga imkoniyat yaratdi.

O'zbekiston Respublikasi Prezidentining 2009 yil 6 apreldagi «Tijorat banklari depozitlariga aholi va xo'jalik subyektlari bo'sh pul mablag'larini jalb etishni yanada rag'batlantirish qo'shimcha chora-tadbirlari to'g'risida»gi va 2015 yil 6 maydagi «Tijorat banklarining moliyaviy barqarorligini yanada oshirish va ularning resurs bazasini rivojlantirish chora-tadbirlari to'g'risida»gi Qarorlari ijrosini ta'minlash hamda aholining bank tizimiga bo'lgan ishonchini mustahkamlash, naqd pul mablag'larining bankdan tashqari aylanmasini qisqartirish, mamlakat iqtisodiyotini jadal rivojlantirish va aholining turmush darajasini oshirish uchun investitsiya resurslarining g'oyat muhim manbai sifatida aholining erkin pul mablag'larini tijorat banklari omonatlariga jalb etishni yanada rag'batlantirish maqsadida «Asaka» bank tomonidan faol ishlar olib borilmoqda. Jumladan, hozirgi kunda 42 turdagi milliy va xorijiy valyutadagi omonatlar joriy qilingan bo'lib, omonatlarni bankning barcha filiallarida rasmiylashtirish mumkin.


Bank tomonidan naqd pul mablag'larining bankdan tashqari aylanmasini qisqartirish va aholining bo'sh pul mablag'larini omonatlarga jalb qilish bo'yicha olib borilgan faol ishlar natijasida aholi omonatlari qoldig'i 2016 yil 1 oktyabr holatiga

o'tgan yilning shu davriga nisbatan 148,9 mlrd.so'mga o'sdi va 720,3 mlrd. so'mni tashkil etdi.



Omonatchilar soni 257,6 ming nafarga o'sdi va 1 821,9 ming nafardan oshdi.

O'zbekiston Respublikasi Prezidentining 2010 yil 19 apreldagi "Bank plastik kartochkalaridan foydalangan holda hisob-kitob tizimini rivojlantirishni rag'batlantirish bo'yicha qo'shimcha chora-tadbirlar to'g'risida"gi Qarorini ijrosini ta'minlash maqsadida plastik kartochkalar asosida hisob-kitob qilish tizimini yanada rivojlantirish bo'yicha faol ishlar olib borilmoqda. Bank tomonidan 2016 yil 1 oktyabr holatiga 1 707,3 ming donadan ortiq plastik kartochkalar muomalaga chiqarildi.



11,02 ming dona terminal, 27 ta bankomat va 46 ta infokiosk o'rnatildi. 9 942 ta korxonalar va tashkilotlarda "ish haqi" loyihalari joriy etildi.

Plastik kartochkalar orqali amalga oshirilayotgan naqd pulsiz hisob-kitoblar hajmi ham kengaymoqda. Joriy yil 9 oyi davomida savdo aylanmalari miqdori 1 758,6 mlrd. so'mni tashkil qildi.

Shu bilan birga, majlisda bankning ayrim filiallari tomonidan kreditlash, buxgalteriya hisobi, pul muomalasi, valuta amaliyotlari, plastik kartochka va boshqa amaliyotlarni bajarishda Markaziy bank hamda Bosh ofis tomonidan yaratilgan imkoniyatlardan talab darajasida foydalanilmayotganligi sababli xato va kamchiliklarga yo'l qo'yilganligi tanqid ostiga olindi.

Barcha muhokama qilingan masalalar yuzasidan «Asaka» bank Boshqaruvi tomonidan tegishli qarorlar qabul qilindi.

Bank Axborot xizmati